

pro themate petita, quale est Epicedium Quintilii *Lib. I. Od. 24. Vel inimitabile*, quod argumenta habet externa à circumstantiis personarum scribentium vel legentium petita. Sic in propemptico Virgilio *Lib. I. Od. III.* digreditur ad incommoda navigiorum, quod ipse Epicureus hoc problemate suam sectam esset commendaturus; ad exempla temerariorum fabulosa, ut versus placerent Grammaticis in Schola docentibus; ad querelam de vitiis, quæ Jovem non paterentur deponere fulmina, ut adularetur Augusto, qui post occupatam Romæ Monarchiam, multorum agnoscebat consilia, quæ poenam videbantur meruisse. Ita in censendis Auctoribus non sufficit iudicium Grammaticum aut Oratorium, sed, in iis præsertim, quos in aulâ claruisse novimus, simul advocari debet iudicium Politicum.

### LOGICUM.

Petrus Svavis in Historiâ Concilii Tridentini *Lib. VI. p. m. 450.* narrat decernendum fuisse, *num Residentia*, h. e. præsentia Episcopi apud suam ecclesiam, *esset juris divini?* ac impositum Patribus, ut simpliciter in suffragiis suis mentem explicarent vocabulis: *Placet* aut *non placet*. Sed LXVIII. dixerunt: *Placet*. XXXIII *non placet*. XIII. *Placet*, consulto prius Pontifice. XVII. *Non placet*, nisi prius consulto Pontifice. Quæritur quomodo discrepaverint, postremi XVII. ab aliis XIII? Si species vim suffragii, nullum est discrimen: hæc enim enunciatio: *Nisi placuerit Pontifici, non placet*, ob duas negationes æquipollet huic: *Si placuerit Pontifici, placet*, adeoq; sensus erat: *negotium Pontifici committendum*. Si tamen species animi intentionem, maxima est diversitas. Priores enim sic dicebant. *Placet, nisi coactus à Pontifice aliter sentire jubeat*. Posteriores: *Non placet, nisi coactus aliter sentire jubeat*.

### DIDACTICUM.

Casparus Knittel, Jesuita apud Pragenses non Incelebris, in Tractatu suo, quem vocavit *Aristotelem curiosum & utilem*, centum Quæstionibus totidem subjecit Parerga, è centum diversis Mathematicis scientiis deprompta. Nam ut curiosus Lector centum has disciplinas habeat in conspectu, nominantur. 1. Geometria Elementaris 2. Arithmetica speculativa 3. Arithmetica practica, 4. Geometria speculativa 5. Conica 6. Geometria practica. 7. Logistica popularis 8. Logistica Astronomica 9. Trigonometria Elementaris 10. Trigonometria practica, 11. Logarithmica, 12. Algebra Zetetica 13 Algebra poristica 14. Algebra exegetica. 15. Astro-